

Morning Regional Dogri News Bulletin, 09th August 2024

मार्निंग डोगरी न्यूज़ बुलेटिन, समे. 09-20 Hrs

<><><><><><>

Headlines

1. भारत दे मुख् च्नुनां आयुक्त् राजीव कुमार् हुंदी अगुवाई च दल जम्मू कश्मीर च च्नुनां सरबंधी तैआरिं दा जायजा लैने लेई 2 दिन दे दौरे पर ऐ।
2. केन्द्रीय राज्यमंत्री रामदास अठावले होरें आखेआ ऐ जे सरकारी स्कीमें आरक्षत समुदाय दे लोकें दे जीवन च बदलाव आन्नेआ ऐ। उनें केन्द्र प्रायोजित स्कीमें थमां लाह ठोआने लेई लोकें गी अपील कीती।
3. नीरज चोपड़ा होरें पैरिस ओलंपिक्स च चांदी दा तगमा जित्तेआ। राष्ट्रपति द्रौपदी मुर्मू ते प्रधानमंत्री नरेन्द्र मोदी होरें उनेंगी मबारकबाद दित्ती।
4. स्वच्छता पखवाड़ा दे सरबंधै च रामबन च साफ सफाई ते बूहटे लाने आली मुहिम चलाई गई।

<><><><><><>

ECI-J&K

भारत दे मुख् च्नुनां आयुक्त् राजीव कुमार् हुंदी अध्यक्षता च च्नुनां आयुक्त् ज्ञानेश कुमार् ते डॉ. एस.एस.संधु हुंदा 2 दिन दा जम्मू कश्मीर दा दौरा शुरू होई गेआ ऐ। इस दरान ओह् केन्द्र शासत प्रदेश च च्नुनां सरबंधी तैआरिं दा जायजा लै'रदे न। इस दौरे दा मकसद खित्ते च सुचारू ते पारदर्शी च्नुनां प्रक्रिया गी जकीनी बनाना ऐ। कल च्नुनां आयोग दे दल नै राष्ट्रीय ते प्रदेश सतह् दी पंजीकृत सियासी पार्टिं दे नुमायंदे ते होरने सरबंधी धड़ें कन्नै मलाटी कती ते उंदे विचारें ते समस्याएं गी सुनेआ। अज्ज उंदा दौरा सम्पन्न होइ जाग। एह दल अज्ज मुख् सचिव, पुलस महानिदेशक हुंदे कन्नै मलाटी करोग। च्नुनां आयोग दा जम्मू औने दा बी कार्यक्रम ऐ, इत्थें ओह् कनून नाफिज करोआने आली अर्जेसिं कन्ने बी मलाटी करगंन। एह दौरा इक प्रेस कांफ्रेंस मगरा सम्पन्न होग।

<><><><><><>

Ramdas Athwale

समाजी न्यांह ते सशक्तिकरण सरबंधी केन्द्री राज्यमंत्री रामदास अठावले होरें समाज कल्याण मैहकमे दे अफसरें कन्नै बैठक लाई। उनें आखेआ जे सरकार नै समाज दे गरीब, कमजोर ते पिछड़े दे वर्ग दी भलाई बेह्तरी आस्तै केई पैहलकदमियां कीतियां न। उनें गलाया जे लोकें गी सरकार दी बक्ख-बक्ख स्कीमें बारे जानकार बनाया जाना लोड़चदा तां जे योग्य ते लोड़मंद लाभार्थिं गी इंदा लाह थहोई सकै। उनें अफसरें गी हिदायत कीती जे ओह् जम्मू कश्मीर च केन्द्र प्रायोजित स्कीमें दी जमीनी सतह् पर बेहतर अमलावरी गी जकीनी बनान। समाज कल्याण मैहकमे दियां आयुक्त् सचिव शीतल नंदा होरें जम्मू कश्मीर च आरखत समुदायें दी स्थिति बारे दस्सेआ। उनें जम्मू कश्मीर च चला'रदे वृद्ध आश्रम, रिहायशी स्कूल बगैरा बारे बी जानकारी दित्ती। शीतल नंदा होरें दस्सेआ जे इसलै 16 वृद्ध आश्रम जम्मू कश्मीर च चलाए जा'रदे न, जिंदे चा 10 कश्मीर च ते 6 जम्मू च न।

<><><><><><>

Neeraj

पैरिस ओलंपिक्स च भारती एथलीट नीरज चोपड़ा होरें सीजन दा अपना सर्वश्रेष्ठ 89.4–5 मीटर थ्रो करियै कल रातीं मर्दे दी नेजा सुट्टने आले मकाबले च चांदी दा तगमा जित्तेआ। एह्दे परैंत पाकिस्तान दे अरशद नदीम नै 92.9–7 दी दूरी पर नेजा सुट्टियै ओलंपिक्स दे पराने सब्बनें रिकार्डै गी त्रोड़ी दित्ता ते सुन्ने दा तगमा हासल कीता। राष्ट्रपति द्रौपदी मुर्मू ते प्रधानमंत्री नरेन्द्र मोदी होरें पैरिस ओलंपिक्स च चांदी दा तगमा जित्तने पर नीरज चोपड़ा होरें गी बधाई दित्ती ऐ। इक संदेस च राष्ट्रपति मुर्मू होरें आखेआ जे मुख्य नीरज चोपड़ा हुंदी उपलब्धि पर गर्व करै करदा ऐ ते उंदी एह् जित्त पक्क गै ओने आली पीढ़िं दा दिल बधाग। अपने संदेस च प्रधानमंत्री होरें आखेआ जे नीरज होरें बार–बार प्रतिभा दा प्रदर्शन कीता ऐ। उनें आखेआ जे भारत बड़ा खुश ऐ की जे नीरज होर इक होर कामयाबी दे कन्ने स्वदेश परतोआ करदे न। गृहमंत्री अमित शाह होरें बी नीरज चोपड़ा हुंदी सराहना कीती ते आखेआ जे नीरज होरें तिरंगे दा मान बधाया ऐ।

<><><><><><>

Amarnath Yatra

जम्मू दे भगवती नगर आले आधार शिविर थमां 398 श्रद्धालुएं दा इक होर जत्थ अज्ज घाटी लेई रवाना होआ। एह् श्रद्धालु अज्ज बडलै जम्मू थमां 14 गड्डिं दे काफले च सुआर होइयै निकले। इस जत्थे च 340 मर्द, 45 महिला, 9 साधु ते 4 बच्चे शामिल न। तांई जम्मू दे भगवती नगर आले आधार शिविर थमां 733 श्रद्धालुएं दा इक होर जत्था बुड्डा अमरनाथ यात्रा लेई रवाना होआ। एह् श्रद्धालु 17 गड्डिं दे काफले च अज्ज बडलै रवाना होए। इस जत्थे च 166 महिला, 551 मर्द, इक साधु ते 16 बच्चे शामिल हे।

<><><><><><>

Machail Yatra(byte)

श्री मचेल माता यात्रा औपचारिक तौर पर 25 जुलाई गी शुरू होइ ही, अदू थमां लेइयै अजे तगर 84 जहार 442 श्रद्धालुएं माता दे मंदर च मत्था टेकेआ ऐ। एह् यात्रा जम्मू खित्ते च बड़ी मती महत्वै आली यात्राएं च इक ऐ। एह् यात्रा कटरा वैष्णो देवी जी दी यात्रा दे मगरा दूर्ई सब्बने शा मती प्रचलित यात्रा ऐ। पिछले बरें 2 लक्ख थमां बद्ध श्रद्धालुएं मचेल पाड्डर च स्थित माता दे मंदर च मत्था टेकेआ हा। छड़ी मुबारक 17 अगस्त थमां रवाना होग।

<><><><><><>

ISRO- Independence Day

भारतीय अंतरिक्ष अनुसंधान संगठन इसरो इस स्वतंत्रता दिवस दा जश्न अंतरिक्ष च पृथ्वी अवलोकन उपग्रैह गी कक्षा च स्थापित करियै मनाग। उपग्रैह गी लांच करने लेई स्याल सैटेलाइट लांच व्हीकल SSLV दा इस्तेमाल कीता जाग ते 15 अगस्त आले रोज बड्डलै 9 बज्जिये 17एँ मँटें पर गासै च छोड़ेया जाग। इसरो आस्सेया विकसित SSLV गी बड़ी घट्ट कीमत पर तैयार कीता जाई सकदा ऐ। इन्ना गै इसी तैयार करने च समां बी घट्ट लगदा ऐ ते कन्ने एह् अपने कन्ने लौहके–लौहके केई उपग्रैह लेइए जाने दी समर्थ रखदा ऐ ते इसी मते घट्ट ढांचागत जरूरतें कन्ने बडे घट्ट समें च प्रक्षेपण लेई तैयार कीता जाई सकदा ऐ। एह् अपने कन्ने 500 किलोग्राम बजनी उपग्रैह 500 किलोग्राम वजनी उपग्रैह 500 किलोमीटर तोड़ी दी कक्षा तगर पुजाई सकदा ऐ। इक्क बारी जिसलै एहदी अजमैश कामयाब होई जंदी ऐ तां इसी उत्पादन लेई निजी क्षेत्र गी मुंतकिल कीता जाग।

<><><><><><>

Plantation Ramban

रामबन दे डिप्टी कमीशनर बसीर उल हक चौधरी हुंदी दिक्ख-रिक्ख च जिले दे बक्ख-बक्ख संस्थाने ते मैहकमे नै स्वच्छता पखवाड़ा 2024 च सक्रिय रूपै कन्नै हिस्सा लैता ते साफ सफाई आगियाने दा आयोजन, रूक्ख बूहटे लाने सरबंधी गतिविधिएं ते जागरूकता कार्यक्रमें दी श्रृंखला दा आयोजन कीता। एहूदा मकसद साफ सुगिरे ते सेहतमंद वातावरण गी बढ़ावा देना हा। इस अभियान च जीडीसी बटौत, चीएचसी मंगेत ब्लाक बनिहाल, सीएचसी बओत ते एसडीएच बनिहाल होरें मरीजें, तीमारदारें ते अमले आस्तै साफ सुथरा माहौल जमीनी बनांदे होई स्वच्छता गतिविधिएं च हिस्सा लैता। बओत जंगलात डिवीजन नै शहीद अब्दुल क्यूम हुदे चेते च रूक्ख बूहटे लाने आले इक अभियान एक पेड़ शहीदों के नाम दा आयोजन कीता। एह सांझे जतन नशा मुक्त भारत अभियान राएं समाजिक जिम्मेदारी गी बढ़ावा देने दे कन्नो कन्नी स्वच्छ, हरा भरा ते सेहतमंद माहौल बनाने लेई प्रतिभागिएं दी प्रतिबद्धता गी दर्शांदे न।

<><><><><><>

ADC Doda

इसलै चला'रदे स्वच्छता पखवाड़ा अभियान दे हिस्से दे तौरा पर डोडा तैहसील दफतर च इक अभियान दा सरिस्ता कीता गेआ। अतिरिक्त डिप्टी कमीशनर सुदर्शन कुमार होरें इक बूहटा लांदे होई इस पैहलकदमी दी शुरूआत कीती। म्युनिसिपल कौंसल डोडा नै इक "स्वच्छ वार्ड अभियान" दी अगुवाई कीती जेहदा विषयसार हा-"आओ अपने शैहरे गी साफ-सुथरा ते हरा-भरा करचै"। इस पैहलकदमी दा मकसद डोडा शैहरे गी साफ-सुथरा ते सनाकड़ा बनाई रखने च लोकें गी शामिल करना ऐ। इस अभियान च बक्ख-बक्ख अधिकारिएं हिस्सा लैता जिंदे च नायब तैहसीलदार डोडा ते म्युनिसिपल कौंसल दा अमला बी शामिल हा। उनें किट्टे रलियै तैहसील दफतर ते आले दुआले मते सारे बूहटे लाए जेहड़ा इस क्षेत्र गी हरा-भरा बनाने लेई इक सांझे जतन दा प्रतीक ऐ। स्वच्छता पखवाड़ा जेहड़ा इक राष्ट्रव्यापी सफाई ते स्वच्छता अभियान ऐ-समूलचे जम्मू कश्मीर च पर्यावरण सरबंधी जागरूकता गी बढ़ावा देने लेई मनाया जा'रदा ऐ।

<><><><><><>

State Taxes Department

प्रदेश कर मैहकमे दियां अतिरिक्त आयुक्त नमृता डोगरा होरें कल सर्कल-डी जम्मू दे करदाताएं कन्नै इक "डीलरस मीट" बैठक दी अध्यक्षता कीती ते माली ब'रदे 2024-25 दी पैहली तिमाही दी माली स्थिति दी समीक्षा कीती। बैठक दरान उनें बाकी त्रऊं तिमाहिएं दरान राजस्व सरबंधी प्रक्रियाएं बारे रणनीति तैआर करने पर जोर पाया। उनें 100 फीसद रिटर्न दायर करने पर बी जोर पाया। उनें एह बी जकीनी बनाने लेई आखेआ जे करदाता खीरी तरीक थमां पैहले पैहले रिटर्न दायर करन। नमृता होरें गलाया जे दिक्खेआ गेआ ऐ जे किश रेहड़ी-फड़ी लाने आलें गी, रैस्टुरेंट-होटल मालकें ते किश होर बपारिएं गी केई यूपीआई खातें राएं भुगतान हासल होआ'रदे न जेहदे कन्नै ओह अपने असल टर्नओवर गी छपा'रदे न ते घट्ट बिक्री दस्सा'रदे न। उनें आखेआ जे इस चाल्ली दा रौह खलाफ मैहकमा तौले गै इनें उल्लंघने दी जांच लेई इक अभियान दी शुरूआत करोग।

<><><><><><>

Rising Prices

विरोधी घड़ें दे सांसदे गंडे ते आलुएं दे भाएं च तेजी गी लेइये अज्ज संसद दे बाहर विरोध प्रदर्शन कीता। सांसदे करसाने गी उंदी फसले दे झाड़ लेई घट्टोघट्ट समर्थन मुल्ल दी कनूनी गरेंटी देने दी बी मंग कीती। विरोध प्रदर्शन च शिवसेना उद्धव गुट दी सांसद प्रियंका चतुर्वेदी, त्रिमूल कांग्रेस दे सांसद डेरेक ओ ब्रायन, राष्ट्रीय जनता दल दे सांसद मनोज कुमार झा, कांग्रेस पार्टी दे प्रमोद तिवारी ते राष्ट्रवादी कांग्रेस पार्टी दियां सांसद सुप्रिया सुले सने होर केई नेता बी मजूद हे।



Panchayat Secretary

ग्रामीण विकास ते पंचैती राज मैहकमे आस्सेआ हाल च लाए गेदे पंचैत सचिवें गी सिखलाई देने लेई 45 रोजा कार्यक्रम लाया जा'रदा ऐ। इस कार्यक्रम तैहत 21 दिनें दी सिखलाई ते 7 दिनें दा दौरा होग जेह्दे च 3 दिन ओह् केन्द्र शासत प्रदेश च ते 4 दिन प्रदेश थमां बाहर दा दौरा लांगन। इस सिखलाई गी पंचैती राज मैहकमे आस्सेआ मंजूरी दिक्ती गई ऐ ते इसी पाजिटिव मूवस इंडिया लिमिटेड दे सैह्योग कन्ने करोआया जा'रदा ऐ। ग्रामीण विकास मैहकमे दे निदेशक होरें गी इस प्रोग्राम गी सफल बनाने लेई एह्दे पर तक्क रखने लेई आखेआ गेआ ऐ।



JKEDI

जम्मू कश्मीर उद्यमिता विकास संसिगन जेकेईडीआई नै अपने बड़ी ब्राह्मणा परिसर च सांबा ते अखनूर सरकारी डिग्री कालेजें दे विद्यार्थिं लेई स्टार्टअप गतिविधिं दे आयोजन कीता। कार्यक्रम दा मकसद स्टार्टअप सरबंधी बचार पेदा करना, प्रतिभागिं च उद्वमशील सोच गी बढावा देना ते हुनर ते नमें विचारें बारे ज्ञान उपलब्ध करोआना हा जेह्दे कन्ने विद्यार्थिं गी उ.मिता गी करियर दे तौर पर चुनने लेई मदद थहोई सकै। इस दरान विद्यार्थी केई गतिविधिं ते सत्रें च शामिल होए, जित्थें उनेंगी नमें कारोबार लेई जरूरी जानकारी बगैरा उपलब्ध करोआई गई। इस कार्यक्रम च केई गल्लबात आले सत्र बी लोआए गे। एह् पैहलकदमी नोजवानें दे विचारें च उद्यमिता दी भावना गी पैदा करने ते उसी बढावा देने दे कन्नो कन्नी उनें गी भविक्ख दे कारोबारी उद्यमें लेई तैआर करने लेई जेकेईडीआई संस्थान दी प्रतिबद्धता गी दर्शादी ऐ।

